

КУН МАВЗУЛАРИ

Эрон Олий раҳбари Мужтабо Ҳоманайи отаси жанозасида кўринмади

Озодлик

Iyul 05, 2026



Оятуллоҳ Али Хоманайи жаноза намози, 5 июль, 2026, Техрон

Эрон олий раҳбари Мужтабо Хоманайи 5 июль кунини эрта тонгда отаси ва ўзидан олдинги олий раҳбар бўлган Оятуллоҳ Али Хоманайи учун ўтказилган жаноза намозидан иштирок этмади.

Бу маросим Али Хоманайи Яқин Шарқдаги уруш бошида АҚШ ва Исроил зарбалари натижасида ҳалок бўлганидан тўрт ойдан ортиқ вақт ўтгач ўтказилди.

Мужтабо Хоманайи 28 февраль кунини отаси ўлган ҳужумда жароҳат олгани ҳақида хабарлар чиққанидан бери кўрингани йўқ. Бу унинг соғлиғига оид саволларни кучайтирмоқда.

Эрон давлат оммавий ахборот воситаларига кўра, Али Хоманай жаноза намози уч босқичда режалаштирилган: аввал Али Хоманай учун, кейин унинг АҚШ–Исроил зарбасида ҳалок бўлган оила-аъзолари, шу жумладан қизи, келини — Мужтабо Хоманайнинг турмуш ўртоғи Захро Ҳаддод Одил — ва 14 ойлик набираси учун.

Мужтабо Хоманай, расмий ахборот воситаларига кўра, отаси вафотидан кўп ўтмай Олий раҳбар этиб тайинланган эди. Бироқ ҳозирча маросимда кўрингани йўқ.

Эронда ворис раҳбар ўзидан олдинги олий раҳбар жанозасини ўқиши анъана ҳисобланади ва таҳлилчилар буни ҳокимият алмашинувининг қонунийлигини мустаҳкамловчи рамзий қадам сифатида баҳолайди.

Мужтабо Хоманай 28 февраль куни отасининг ҳаётига зомин бўлган ҳужумда жароҳат олгани ҳақида хабарлар чиққанидан бери омма олдида кўрингани йўқ. Шу вақт ичида унинг ҳеч қандай аудио ёки видеомурожаати ҳам эълон қилинмади.

Бу ҳолат унинг соғлиғи ва олий раҳбарлик вазифаларини бажариш қобилияти ҳақида саволларни кучайтирмоқда.

Эрон расмийлари унинг жанозада қатнашмаганини хавфсизлик сабаблари билан изоҳлаши мумкин. Бироқ маросимда Ислом республикасининг деярли барча юқори мартабали амалдорлари иштирок этгани ҳукумат хавфсизлик чораларига ишонаётганини кўрсатди.

Бу эса эҳтимолий Исроил ёки АҚШ ҳужуми хавфига қарамай шундай бўлган.

Маросимда президент Масъуд Пизишкиён ҳамда парламент раиси Муҳаммад Боқир Қолибоф иштирок этди.

Шунингдек, Ислом инқилоби муҳофизлари корпуси (ИИМК) кўмондонлари ва Эроннинг хориждаги ҳарбий ҳамда махфий операцияларини бошқарувчи ИИМКнинг "Қудс" кучлари юқори мартабали офицерлари ҳам қатнашди.

3 июль куни АҚШ президенти Дональд Трамп Вашингтон Техронга жаноза маросимлари муносабати билан "бир ҳафталик танаффус" бергани, шундан кейин

АҚШ ва Эрон ўртасида доиравий тинчлик келишувини амалга ошириш бўйича билвосита музокаралар қайта бошланишини айтган эди.

Али Хоманайнинг яна уч ўғли — Мустафо, Масъуд ва Майсам Хоманайлар уруш бошлангандан бери оммага кўринмаган бўлса-да, 5 июль куни отасининг тобути ёнида ҳозир бўлди.



Али Хоманайнинг уч ўғли - (чапдан ўнга) Майсам, Масъуд ва Мустафо, 5 июль, 2026

Али Хоманай билан боғлиқ жаноза ва мотам маросимлари Эрон ҳамда Ироқнинг турли шаҳарларида олти кун давом этади. Унинг дафн маросими 9 июль куни марҳум олий раҳбарнинг туғилган шаҳри Машҳадда ўтказилиши режалаштирилган.

Эрон давлат телевидениеси хабар қилишича, 3 июль куни айрим хорижий давлатлар вакиллари маросимда иштирок этиш учун Техронга етиб борган.

Давлат телевидениеси тарқатган кадрларда Хитой, Беларус, Ироқ ва Туркманистон делегацияларининг Техронга боргани намойиш этилди.

Шунингдек, Эрон расмий телевидениеси Ўзбекистон делегацияси - Олий Мажлис Қонунчилик палатаси Спикери Нуриддин Исмоилов бошчилигидаги делегация Эронга боргани намойиш қилинди.



Ўзбекистон делегацияси Эрон олий раҳбарининг дафн маросимида иштирок этди

Эронда марҳум олий раҳбар Али Хоминаий билан видолашиш учун 6 кунлик мотам маросимлари бошланди. Унда Олий Мажлис Қонунчилик палатаси спикери Нуриддин Исмоилов бошчилигидаги делегация ҳам иштирок этди.

Kun.uz расмий канали

👍 619 ❤️ 255 🙏 116 😊 42 😄 31 🤔 29
🔥 13 🙌 10

t.me/kunuzofficial/172111

283K 🌐 Jul 3 at 14:21

4 июль куни Техронда бошланган жаноза маросимларининг биринчи куни кучайтирилган хавфсизлик чоралари, хавфсизлик кучларининг кенг кўламда сафарбар этилиши ҳамда 5 июль куни умуммиллий дам олиш куни деб эълон қилиниши билан ажралиб турди.

Расмийлар кенг қамровли мотам тадбирларини ташкил этаркан, яқин кунларда ўтказиладиган жаноза юришларига миллионлаб одамни жалб қилишга уринмоқда. Шу мақсадда иштирокчилар учун бепул транспорт, озиқ-овқат ва жойлаштириш хизматлари тақдим этилмоқда.

Жаноза маросимлари доирасида Эрон парламенти раиси Муҳаммад Боқир Қолибоф ҲАМАС раҳбарият кенгаши раиси Муҳаммад Дарвиш билан учрашди.



Теҳрондаги Катта Мусалла намозгоҳида Оятуллоҳ Али Хоманай билан вилдолашиш учун йиғилган издиҳом, 4 июль, 2026

Эрон давлат оммавий ахборот воситалари Қолибофнинг сўзларидан иқтибос келтириб, Теҳрон АҚШ билан "тинчлик ҳолатида эмаслиги" ва Исроилни тан олмаслигини билдирганини хабар қилди.

Шу билан бирга, у АҚШ ва Эрон ўртасидаги доиравий келишувни амалга ошириш жараёнини "қийин, аммо эришса бўладиган" вазифа деб баҳолаган.

Эрон давлат матбуоти маълумотида кўра, жаноза маросимларида ҲАМАС, "Ҳизбуллоҳ", Хусийлар ҳамда Яқин Шарқдаги Эрон қўллаб-қувватлайдиган бошқа қуролли гуруҳлар делегациялари ҳам иштирок этган. АҚШ ва Европа Иттифоқи ҲАМАСни террорчи ташкилот деб тан олган.

"Ҳизбуллоҳ" эса АҚШ томонидан тўлиқ террорчи ташкилот сифатида рўйхатга киритилган бўлса, Европа Иттифоқи мазкур ҳаракатнинг фақат ҳарбий қанотини террорчи тузилма деб ҳисоблайди.

Шу билан бир вақтда, минтақанинг бошқа ҳудудларида ҳам хавфсизлик билан боғлиқ хавотирлар юқори даражада сақланиб қолмоқда.

Денгиз қатновлари хавфсизлигини кузатувчи Буюк Британия Денгиз Савдо Амалиётлари Маркази (УКМТО) 5 июль куни Яманнинг Қизил денгиз соҳилидаги Ал-Худайда порти жануби-ғарбида юк кемаси номаълум қуролланган шахслар ҳужумига учрагани ҳақида хабар олганини маълум қилди.

Кема фавқулодда ёрдам сигнали юборган ва ҳодиса юзасидан текширув олиб борилмоқда. УКМТО мазкур ҳудуддан ўтаётган кемаларни эҳтиёткорликка чақириб, ҳар қандай шубҳали фаолият ҳақида зудлик билан хабар беришни тавсия қилди.

Россиянинг "Интерфакс" агентлиги хабарига кўра, 5 июль куни Россия президенти Владимир Путин ва АҚШ президенти Дональд Трамп телефон орқали мулоқот қилиб, Эрон масаласини муҳокама қилган.

Кремль баёнотига кўра, Путин АҚШ ва Эрон ўртасида давом этаётган билвосита музокаралар можаро бўйича "томонларнинг ҳар иккиси учун мақбул бўлган узоқ муддатли ечимлар"ни топишга ёрдам беришидан умид билдирган.

Оқ уй ҳозирча мазкур телефон мулоқоти юзасидан ўз баёнотини эълон қилгани йўқ.



Озодлик

- ozodlikmail@gmail.com
- uzbek@rferl.org
- WhatsApp / Telegram / Signal
- +420724740755 | +420602612713